



2020-2

31. august 2020

All. nr./notatnr.:

2020-907-0002-3

Sull./sagsbeh.: BKT/jh

Pineqartut: Kingumoortumik atuutilersoq, aalajangiinerit nalunaarutigineqartarnerat, pisortanit ikiorsiissutit, inatsisikkut tunngavissaqarnissamik piumasaqaat

Innuttaasup inuuniarnermut ikiorsiissutisiai kommunip kingumoortumik atuutilersumik ikililersinnaangilai

Ombudsmandip 2019-imi oqaaseqaammi oqaatigaa innuttaasup inuuniarnermut ikiorsiissutisiaanik Kommuneqarfik Sermersuup (matuma kingornatigut kommunimik taaneqartartussap) ikililersimanera inatsiseqartitsinermik atuuttumik unioqqutitsisuuq, tassami aalajangiineq innuttaasumut toqqartumik nalunaarutigineqarsimangimmat.

Ombudsmandi isumaqarpoq kommunip aamma Isumaginninnermi Naammagittaalliuuteqartarfiup (matuma kingornatigut Naammagittaalliuuteqartarfimmik taaneqartartussap) suliamik suliarinninnerat isorissalalerujussuusimasoq. Kommunimmi aalajangiinera Naammagittaalliuuteqartarfiup aalajangiusimasimammagu.

Oqaaseqaat 2019-6-imi normoqartoq Ombudsmandip nittartagaani nassaarineqarsinnaavoq.

Suliaq Naammagittaalliuuteqartarfiup tamatuma kingornatigut suliareqqippaa, kommunillu aalajangiinera atuussinnaassuseqanngitsutut isigalugu. Suliaq Naammagittaalliuuteqartarfiup suliareqqitassanngortillugu kommunimut utertippaa, taamaalilluni kommuni nutaamik aalajangiininaqqullugu.

Kommuni suliami nutaamik 22. januar 2020-mi aalajangiivoq. Aalajangiinermi tassani innuttaasup inuuniarnermut ikiorsiissutisiai 1. januar 2015-imit sunniuteqartumik ikililernerqarput.

Kommuni innuttaasup inuuniarnermut ikiorsiissutisiaanik aalajangiineq sioqqullugu sunniuteqartumik (kingumoortumik atuutilersumik) ikililersinnaanersoq nammineerluni misissuiffigalugu Ombudsmandip aallartippaa.

Kommuni isumaqarpoq Naammagittaalliuuteqartarfiup aalajangiinerata kommuni kingumoortumik atuutilersumik aalajangiinissaanut pisussaaffileraa.

Naammagittaalliuuteqartarfiup aalajangiineranik kommunip paasinninnera Naammagittaalliuuteqartarfiup Ombudsmandilluunniit isumaqatiginngilaat.

Ombudsmandip tamatumunnga atatillugu oqaatigaa kommuni innuttaasup inuuniarnermut ikiorsiissutisiaanik kingumoortumik atuutilersumik ikililerippat inatsisiliortut taamaaliornissamut piginnaatitsissutaat ersarissoq piusariaqartoq. Ombudsmandi isumaqarpoq inatsisit kommunimut taamatut piginnaatitsissummik tunniussinngitsut.

Taamaattumik Ombudsmandip paasinninnera unaavoq kommuni innuttaasup ikiorsiissutisiaanik aalajangiineq sioqqullugu sunniuteqartumik aalajangiinissaminut pisinnaatitaaffeqaanngitsoq. Kommunip aalajangiinnera Ombudsmandip isorisarialerujussuartut isigaa.

Kommunip suliaq suliareqqissagaa Ombudsmandillu oqaatigisai isiginiarlugit suliarissagaa Ombudsmandip inassutigaa.

(Oqaaseqaat 31. august 2020-meersoq, j.nr. 2020-907-0002)

Ombudsmandip oqaaseqaataa:

"1. Suut misissorpakka?

1.1. Kommuneqarfik Sermersuup (matuma kingornatigut kommunimik taaneqartartussap) aalajangiineranit 22. januar 2020-meersumit erserpoq A-p inuuniarnermut ikiorsiissutisiai ullut 14-ikkaarlugit tunniunneqartartut 1. januar 2015-imit sunniunneqartumik 775 kr.-nut ikililernerqassasut.

Taamaattumik kommuni A-p inuuniarnermut ikiorsiissutisiai 1. januar 2015-imit sunniunneqartumik ikililernerqassasut aalajangiisinnaanersoq misissorpara.

Suliaq taanna nammineerluni misissuiffiginninnertut aallartippara. Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-meersuni § 15, imm. 1 innersuussutigaara.

Oqaaseqaatinni Danmarkimi inatsiseqartitsinermi periaaseq inatsiseqartitsinerlu pillugu atuakkiat/allaaserisat kiisalu Folketingip Ombudsmandiata periaasia aallaavigisarpakka, tassami Kalaallit Nunaanni inatsiseqartitsinikkut tungaviup Danmarkimi inatsiseqartitsinikkut tungavik pingaarnerusutigit assigimmagu, tamannalu innersuussutini taaneqartuni takuneqarsinnaavoq.

1.2. Eqqortussaq anguniarlugu oqaatigaara kommunip aalajangiineranit 22. januar 2020-meersumik suliarinninninnut atatillugu A-p inuuniarnermut ikiorsiissutisiaanik ullut 14-ikkaarlugit tunniunneqartartunik 775 kr.-nut ikililernerq eqqortuunersoq isummerfiginngikkiga.

Kommuni suliat suliamut matumunnga assingusut Isumaginninnermi Naammagittaalliuteqartarfiup (matuma kingornatigut Naammagittaalliuteqartarfimmik taaneqartartussap) aalajangiinera 17. december 2019-meersoq tungavigalugu suliareqqinnissaannut pisussaaffeqarnersoq massakkut aamma isummerfiginngilara.

Kommuni suliat suliamut matumunnga assingusut suliareqqinnissaanut pi-sussaaffeqarnerseq apeqqutip uterfiginissaanut periarfissaq ammaffigaara.

2. Suliap naatsumik allaaserineqarnera

A-p inuuniarnermut ikiorsiissutit siusinnerusukkut tunniunneqartartunit ikin-nerusunik aningaasartallit kommunimit tunniunneqarsimanerat ikililerinerlu sioqqullugu ilisimatinneqarsimannginninni uannut 26. januar 2015-imi naammagittaalliutigaa.

Naammagittaalliut ingerlateqqillugu Naammagittaalliuteqartarfimmut 13. februar 2015-imi nassiuppara.

Naammagittaalliuteqartarfik suliame 17. maj 2017-imi aalajangiivoq. Kommunip aalajangiinera Naammagittaalliuteqartarfiup aalajangiusimavaa.

Kommunip aamma Naammagittaalliuteqartarfiup suliamek sularinninneranik nammineerluni misissuiffigininneq Naammagittaalliuteqartarfiup aalajangiinera tunngavigalugu aallartippara.

Suliaq pillugu oqaaseqaataagallartoq kommunimut aamma Naammagittaalliuteqartarfimmut 3. oktober 2019-imi nassiuppara.

Naammagittaalliuteqartarfik uannut 11. november 2019-imi allappoq suliaq A-mut tunngasoq Naammagittaalliuteqartarfiup oqaaseqaatigigallagara tunngavigalugu suliareqqinniaraa.

Suliaq pillugu inaarutaasumik 3. december 2019-imi oqaaseqaateqarpunga. Oqaaseqaammi ilaatigut allappunga suliame annertunerusumik iliuuseqaqqinnissannut tunngavissaqarnerseq Naammagittaalliuteqartarfiup aalajangiinera rata nutaap assilinera tigugukku isummerniartunga. Oqaaseqaat nittartakanni 2019-6-imik suliatut normoqarluni tamanut saqqummiunneqarpoq.

Naammagittaalliuuteqartarfik nutaamik 17. december 2019-imi aalajangiivoq, kommunillu aalajangiinera Naammagittaalliuuteqartarfiup atuussinnaasuseqanngitsutut isigaa, suliarlu suliareqqitassanngortillugu utertillugu.

Kommuni 23. december 2019-imi qinnuigaara Naammagittaalliuuteqartarfiup aalajangiinera suliaq A-mut tunngasoq suliallu tassunnga assingusinnaasut eqqarsaatigalugit kommunip qanoq iliuuseqarnissaanut pissutissaqalersitsinersoq uannut ilisimatitsissutigeqqullugu.

Kommunip allagai kommunip aalajangiinerata 22. januar 2020-meersup assilineranik kiisalu kommunip sulianut inuuniarnermut ikiorsiissutinut tunngasunik suliamut matumunnga assingusunut 2015-imeersunut malitseqartitsiviginninnera pillugu ilisimatitsissummik ilaqartut 7. maj 2020-mi tiguakka.

Kommuni 2. juni 2020-mi qinnuigaara A-p inuuniarnermut ikiorsiissutisiaanik kingumoortumik atuutilersumik ikililerisoqarnissaanik aalajangiinermut 22. januar 2020-meersumut kommunip inatsisikkut tunngavigisaa pillugu nasuiaateqaqqullugu. Tassani inatsiseqartitsinikkut tunngavimmik uanga paasinninnera kommunimut malugeqquara.

Suliaq pillugu oqaaseqaat kommunip uannut allakkatigut 18. juni 2020-meersutigut nassiuppaa, tassanilu kommunip aalajangiineq Naammagittaalliuuteqartarfiup aalajangiinera 17. december 2019-imeersoq kommunip uannut allakkamini 18. juni 2020-meersumi saqqummiussaa kommunip kingumoortumik atuutilersumik aalajangiinissaanik pisussaaffiliisoq kommunip isumaqarneranik tunngavilersorpaa.

Naammagittaalliuuteqartarfik 25. juni 2020-mi qinnuigaara Naammagittaalliuuteqartarfiup aalajangiineranik 17. december 2019-imeersumik kommunip uannut allakkamini 18. juni 2020-meersuni saqqummiussaanic kommunip paasinninnera Naammagittaalliuuteqartarfiup isumaqatigineraa paasissutissiissutigeqqullugu.

Naammagittaalliuuteqartarfiup akissutaa 17. august 2020-mi tiguara, Naammagittaalliuuteqartarfillu taakkunani ilaatigut allappoq piffissaq kommunip nutaamik aalajangiinerata sunniuteqalerfia aalajangiineri 17. december 2019-imeersumi isummerfigineqanngitsoq.

3. Inatsiseqartitsinikkut tunngavik

3.1. Kingumoortumik atuutilersumik aalajangiinerit

3.1.1. Aalajangiineq piffissamit innuttaasumut nalunaarutigineqarfimminit inatsiseqartitsinikkut aallaavittut sunniuteqalersarpoq.

Aallaavik taanna oqartussaasup taamaaliornissaminut inatsisiliortunit piginnaatitsissummik (inatsisikkut tunngavissamik) peqaruni aatsaat saneqqusinnaavaa.

Piginnaatitsissutip qanoq erseqqitsiginissaanik nalorninaatsiginissaanillu apeqqummi aalajangiinerup pineqartup innuttaasumut qanoq annertutigisumik akuliuttuunera aalajangiisuuvoq.

3.1.2. Kingumoortumik atuutilersumik aalajangiinerit innuttaasunut aallaavittut akuliuttuusarput. Taamaattumik oqartussaasoq kingumoortumik atuutilersumik aalajangiiniaruni inatsisikkut erseqqissumik nalorninaatsumillu tunngavissaqassasoq piumasaqaataavoq.

Tamanna Højesteretsip eqqartuussutaatigut Ugeskrift for Retsvæsen 2016-imi quppernermi 140-mi issuarneqartukkut ilaatigut aalajangersarneqarpoq. Suliami tassani kommuni napparsimanermi ullormusiat unitsinneqarnissaanik kingumoortumik atuutilersumik aalajangiisimavoq, pisoq taanna pillugu siusinnerusuklut aalajangiinerup atuussinnaassuseqannginnera oqaatigineqareersoq. Højesteret isumaqarpoq napparsimanermi ullormusiat pillugit inatsimmi imaluunniit ingerlatsinermik inatsiseqartitsinermi tunngavinni nalinginnaasuni aalajangiinerup nutaap kingumoortumik atuutilernissaanut tunngavissaqanngitsoq.

Assersuutit tamatuma pissuseqatai Østre Landsretsip eqqartuussutaani Ugeskrift for Retsvæsen 1996-imi quppernermi 724-mi aamma Ugeskrift for Retsvæsen 2018-imi quppernermi 2849-mi issuarneqartuni takukkit.

Qulaani isumaliutersuutit Danmarkimi ingerlatsinermik inatsiseqartitsineq pillugu atuakkiani aamma ilalernerqarput. Søren H. Mørupip allallu atuakkiaanni "Forvaltningsret"-imi (2018-imeersumi) quppernerit 311 tulluilu, Sten Bønsingip atuakkiaani "Forvaltningsret"-imi sisamassaanik naqitertinneqartumi (2018-imeersumi) quppernerit 235 tulluilu aamma qupperneq 308, Karsten Revsbechip aamma Søren H. Mørupip allallu atuakkiaanni "Forvaltningsret, Almindelige Emner"-mi arfinilissaanik naqitertinneqartumi (2016-imeersumi) quppernerit 193 tullialu aamma qupperneq 551, Jon Andersenip allallu atuakkiaanni "Forvaltningsret"-imi aappassaanik naqitertinneqartumi (2002-meersumi) quppernerit 301 tulluilu aamma Bent Christensenip atuakkiaani "Forvaltningsret Opgaver Hjemmel Organisation"-imi aappassaanik naqitertinneqartumi (1997-imeersumi) quppernerit 226 tullialu tamatumunnga atatillugu innersuussutigaakka.

Taakkua saniatigut Folketingip Ombudsmandiata 2016-imi ukiumoortumik nalunaarutaani qupperneq 33 innersuussutigaara, Ombudsmandillu kommunip kingumoortumik atuutilersumik nutaamik aalajangiinissamut periarfissaa pillugu tassani ilaatigut makku oqaatigai:

"3.3.4. Taamaalilluni aalajangiinermik nalunaarutiginnikkut kukkunerup suliami illua'tungiusup aalajangiinermik kingusinnerusukkut nalunaarfigineqarneratigut (-rinnaatigut) (imaluunniit piffissami taannaasumi, tassalu kingumoortumik, atuutilersumik nutaamik aalajangiinikkut) "aaqqinnissaanut" periarfissaqanngilaq.

[...]

Uanga paasinninnera unaavoq piffissami tunngaviusumik aalajangiinerup 37-15-ip tamanut saqqummiunneqarfiata nalaani, imaluunniit piffissamit kommunip Ankestyrelsip aalajangiineranik siullermik kommunip aalajangiinerata atuussinnaasuseqannginneranik oqaatiginnittumik tigusaqarfianit (uanga paaseqqaakkattut

29. juli 2015-imit) kommunimut erseqqissimassagaluartoq nalunaaruteqarnermi kukkuneq suliami illua'tungiusut marluutillugit/inooqataasup pisartagaqartumut nalunaarutaaqqaartumik paasitinneqarnerinnaasigut imaluunniit kingumoortumik atuutilersumik nutaamik aalajangiinikkuinnaq "aaqqissinnaanagu." (Ombudsmandeqarfimmi nutsigaavoq)

3.1.3. Uanga paasinninnera unaavoq pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi kingusinnerusukkut allannguuteqartinneqartumi inuuniarnermut ikiorsiissutit pillugit mallittarisassat inatsisilluunniit allat aalajangersakkanik aalajangiinerit piffissamit innuttaasumut nalunaarutigineqarfimminnit inatsiseqartitsinikkut sunniuteqalertarnerannik aallaaviup saneqqunnissaanut inatsisiliortut kommuninut piginnaatitsisimanerannik ilimaginninnissamat tunngavissaliisunik imaqaangitsut.

4. Kommunip isumaa

4.1. Kommunip uannut oqaaseqaammini 18. juni 2020-meersumi ilaatigut makku oqaatigai:

"Isumaginninnermi Naammagittaalliuuteqartarfiup suliareqqitassanngortitsilluni aalajangiinerani 17. december 2019-imeersumi tunngaviit kommunip malippai, tassanilu Naammagittaalliuuteqartarfik imatut allappoq:

Suliaq Isumaginninnermi Naammagittaalliuuteqartarfiup suliareqqitassanngortillugu utertippaa. Tassa imaappoq suliaq kommunip suliareqqissagaa. Taamaattumik inissinneqassaait soorlusooq kommuni 2015-imi januarip aallartin-nerani ilinnut aalajangiisimangitsoq.

Taamaattumik pisortanit ikiorsiissutinik taamani pisinnaatitaasimanersutit ikiorsiissutisisinnaatitaaguillu qanoq amerlatigisumik ikiorsiissutisisinnaatitaasimanersutit kommunip massakkut nalilersussavaa. Aalajangiineq kommunip tamatum kingornatigut ilinnut eqqortumik nalunaarutigissavaa.

Isumaginninnermi Naammagittaalliuuteqartarfik "taamani"-mik allammat kommunip tamanna 2015-imi januaritut paasivaa, taamaalilluni aalajangiineq 2020-

mi aalajangiinerup nalaaniit siumuinnaq atuunnani kingumoortumik 2015-imi januarimit atuutissalluni." (Ombudsmandeqarfimmi nutsigaavoq)

5. Naammagittaalliuuteqartarfiup isumaa

5.1. Isumaginninnermi Naammagittaalliuuteqartarfiup allakkani 17. august 2020-meersuni ilaatigut makku uannut oqaatigai:

"Apeqqummut 1-imut akissut

Isumaginninnermi Naammagittaalliuuteqartarfiup allattoqarfiata tunngaviutippaa Inatsisartut Ombudsmandiata allakkamini 25. juni 2020-meersuni immikkoortoq una innersuussutigigaa:

"Isumaginninnermi Naammagittaalliuuteqartarfik "taamani"-mik allammat kommunip tamanna 2015-imi januaritut paasivaa, taamaalilluni aalajangiineq 2020-mi aalajangiinerup nalaaniit siumuinnaq atuunnani kingumoortumik 2015-imi januarimit atuutissalluni."

Kommunip aalajangiinera 2015-imi januarimeersoq Isumaginninnermi Naammagittaalliuuteqartarfiup aalajangiinermi 17. december 2019-imeersumi suliareqqitassanngorlugu utertippaa. Taamatuttaaq, aalajangersimasumik periaaseq malillugu, kommunip nutaamik aalajangiinissanut ataatsimut tunaartarisassat Isumaginninnermi Naammagittaalliuuteqartarfiup innersuussutigai, matumani aalajangiinerup nutaap aningaasat qassiussusiannik imaqartussaanera kiisalu innuttaasumut eqqortumik nalunaarutigineqartussaanera ilanngullugit eqqarsaatigalugit.

Kommunip aalajangiinermi nutaami suna angusariaqarneraa aalajangiinermi 17. december 2019-imeersumi erseqqissumik isummerfigineqanngilaq. Tamannami isummerfigineqarsimagaluarpat Isumaginninnermi Naammagittaalliuuteqartarfiup oqartussaasutut siullertut aalajangiinera pineqassagaluarmat.

Piffissaq kommunip aalajangiinerata nutaap sunniuteqalerfia aalajangiinermi 17. december 2019-imeersumi erseqqissummik aamma isummerfigineqanngilaq. Kommunip aalajangiinerata siulliup sunniutaa kisimi suliareqqitassanngortitsinikut erseqqissumik isummerfigineqarpoq: Tassalu innuttaasoq soorlusooq aalajangiisoqarsimanngitsutut inissinneqassasoq.

Apeqqummut 2-mut akissut

Apeqqummut 1-imut akissummi qulaani oqaatigineqartutut piffissaq kommunip aalajangiinerata nutaap sunniuteqalerfia Isumaginninnermi Naammagittaalliuuteqartarfiup aalajangiinerani 17. december 2019-imeersumi erseqqissumik isummerfigineqanngilaq.

Kommunip aalajangiineranut nutaamut inatsisikkut tunngavigisamik itisiliineq eqqarsaatigalugu kommuni oqartussaasutut eqqortutut innersuussutigineqarpoq.” (Ombudsmandeqarfimmi nutsigaavoq)

6. Uanga naliliinera

6.1. Kommunip aalajangeeqqaarnera atuussinnaassuseqanngitsoq Naammagittaalliuuteqartarfiup aalajangiinermini 17. december 2019-imeersumi oqaatigaa, aalajangiinerup A-mut eqqortumik nalunaarutigineqarsimannginera pissutigalugu. Suliaq Naammagittaalliuuteqartarfiup nutaamik suliarissanngortillugu kommunimut utertippaa, taamaattumillu kommuni suliami nutaamik aalajangiisussaalluni.

Kommunip aalajangiineranit nutaamit 22. januar 2020-meersumit erserpoq aalajangineq nutaaq taanna piffissamit 1. januar 2015-imit sunniuteqalersoq. Taamattumik aalajangiineq 22. januar 2020-meersoq kingumoortumik atuutilerpoq.

Kommunip uannut allagai 18. juni 2020-meersut imatut paasivakka kommunip aalajangiinerata 22. januar 2020-meersup piffissaq sunniuteqalerfia 1. januar 2015-iusoq kommunip assortunngikkaa.

6.2. Kommuni A-p inuuniarnermut ikiorsiissutisiaasa kingumoortumik atuutilersumik ikililernerneqarnissaannik aalajangiinissamut inatsisikkut tunngavissaqartoq kommunip aalajangiinerani 22. januar 2020-meersumi takuneqarsinnaanngilaq.

Kommunimut allakkanni 2. juni 2019-imeersuni kommuni qinnuigaara inatsikkut tunngavigisaq taanna pillugu nassuiaateqaqqullugu, tassami inatsikkut tunngavigisaq kommunip aalajangiinerani takuneqarsinnaangimmat.

“Naammagittaalliuuteqartarfiup suliareqqitassanngortitsilluni aalajangiinerani 17. december 2019-imeersumi tunngaviit kommunip mali[kk]ai” kommunip akissummini 18. juni 2020-meersumi taamaallaat nassuiaatitut oqaatigaa, tak. qulaani imm. 4.1.

Kommunip akissutaa 18. juni 2020-meersaq imatut paasivara kommuni isumaqartoq kommunip aalajangiinerata nutaap piffissamit 1. januar 2015-imit sunniuteqalissaneranik tunaartarisassaq Naammagittaalliuuteqartarfiup aalajangiinerani 17. december 2019-imeersumi aalajangersarneqartoq.

Aammattaaq imatut paasivara kommuni isumaqartoq Naammagittaalliuuteqartarfiup aalajangiinera 17. december 2019-imeersaq A-p inuuniarnermut ikiorsiissutisiaanik kommunip piffissamit 1. januar 2015-imit sunniuteqalersumik ikililerisinnaaneranut tunngavittut naammattoq.

Kiisalu paasivara Naammagittaalliuuteqartarfiup aalajangiineranik 17. december 2019-imeersumik paasinnineq erseqqissartinniarlugu kommunip Naammagittaalliuuteqartarfik attaveqarfigisimanngikkaa, kommunip aalajangiinera 22. januar 2020-meersaq sioqqullugu imaluunniit inatseqartitsinik kut tunngavimmik paasinninninnik allakkatigut 2. juni 2020-meersutigut maluginneqqusinerma kingornatigut.

6.3. Isumaqarpunga A-p inuuniarnermut ikiorsiissutisiaasa ikililernerqarnissaannik aalajangiineq piffissamit aalajangiinerup nalunaarutigineqarnera ukiut tallimat missaannik sioqqullugu sunniuteqalersaq aalajangiinerusaq immikkut akuliuffiusaq.

Taamaattumik kommuni A-p inuuniarnermut ikiorsiissutisiaasa piffissamit 1. januar 2015-imit sunniuteqartumik ikililernerqarnissaannik aalajangiiniaruni

erseqqissumik qularnaatsumillu tunngavissaqassaaq, tak. qulaani imm. 3.1-mi allaaserisakka.

Isumaqarpunga pisortanit ikiorsiissutit pillugit Inatsisartut peqqussutaanni nr. 15-imi, 20. november 2006-imeersumi kingusinnerusukkut allannguuteqartinneqartumi inuuniarnermut ikiorsiissutit pillugit malittarisassat inatsisilluunniit allat tunngavissamik erseqqissumik qularnaatsumillu taamaattumik imaqaanngitsut, tak. qulaani imm. 3.1.3.

Taamaattumik uanga paasinninnera unaavoq inatsisiliortut kommuni aalajangiinerit innuttaasumut nalunaarutigineqarnerminnit inatsiseqartitsinikkut sunniuteqalertarnerannik aallaaviup saneqqunnissaanut piginnaatissimanngikkaat.

Taamaattumik isumaqarpunga kommuni A-p inuuniarnermut ikiorsiissutisiaanik 1. januar 2015-imit sunniuteqalersumik ikililerinissaminut inatsisikkut pisariaqartumik tunngavissaqaanngitsoq.

6.4. Kommunip Naammagittaalliuuteqartarfiup aalajangiineranik 17. december 2019-imeersumik paasinninnera eqqarsaatigalugu oqaatigaara kommunip aalajangiinera nutaaq piffissamit 1. januar 2015-imit sunniuteqalissasoq Naammagittaalliuuteqartarfiup aalajangiinerani takuneqarsinnaanngitsoq.

Tamatuma saniatigut oqaatigaara uanga paasinninnera unaasoq Naammagittaalliuuteqartarfiup aalajangiinerani immikkoortumik (qulaani imm. 4.1 takuuk) kommunip erseqqissaanera kommunip aalajangiinerata nutaap kingumoortumik atuutilissaneranik Naammagittaalliuuteqartarfiup isumaqarneratut paasineqarsinnaanngitsoq.

Immikkoortup oqaasertai aamma naammagittaalliorfissatut oqartussaasup tamatumunnga tunuliaqutaasoq inatsisikkulluunniit tunngavigisaq pillugu nassuiaateqarani siullertut aalajangiisussatut oqartussaasoq kingumoortumik atuutilersumik aalajangiissasoq tunaartarisassanik aalajangersaassappat er-

seqqissuutitsinissap piumasaqaataasariaqarnera pingaartillugit isiginiarpakka.

Taamaattumik Naammagittaalliuuteqartarfiup aalajangineranik 17. december 2019-imeersumik kommunip paasinninnera ilalinngilara.

Aammattaaq oqaatigaara Naammagittaalliuuteqartarfiup uannut allakkamini 17. august 2020-meersuni oqaatigigaa kommunip nutaanik aalajangiinissaanut ataatsimut tunaartarisassat Naammagittaalliuuteqartarfiup aalajangiinermini 17. december 2019-imeersumi aalajangersarai, matumani aalajangiinerup aningaasat qassiussusiannik imaqartussaanera kiisalu innuttaasumut eqqortumik nalunaarutigineqartussaanera ilanngullugit eqqarsaatigalugit. Naammagittaalliuuteqartarfik tamatuma saniatigut allappoq piffissaq sunniuteqalerfik imaluunniit kommunip aalajangiinerata nutaap qanoq inernilerneqarnissaa Naammagittaalliuuteqartarfiup aalajangiinerani aalajangersimasumik isummerfigineqanngitsut, tak. qulaani imm. 5.1.

Naammagittaalliuuteqartarfiup uannut oqaaseqaataa 17. august 2020-meersoq imatut paasivara Naammagittaalliuuteqartarfik isumaqartoq aalajangiinini kommunip aalajangiinerata nutaap piffissamit 1. januar 2015-imit sunniuteqalernissaa pillugu tunaartarisassanik aalajangersaasuunngitsoq, aalajangiinermini taamaallaat ataatsimut tunaartarisassat ingerlatsinermik inatsiseqartitsinermi tunngavilersuisarneq il.il. pillugit malittarisassat tunngavigalugit aalajangersarneqartut.

Naammagittaalliuuteqartarfik isumaqatigaara oqarmat kommunip aalajangiinerata nutaap piffissamit 1. januar 2015-imit sunniuteqalissaneranik tunaartarisassat Naammagittaalliuuteqartarfiup aalajangiinerata 17. december 2019-imeersup aalajangersanngikkai.

6.5. Ataatsimut isiginnillunga paasinninnera unaavoq kommuni A-p inuuniarnermut ikiorsiissutisiaasa 1. januar 2015-imit sunniuteqartumik ikililerneqarnissaannik 22. januar 2020-mi aalajangiinermini inatsisikkut pisariaqartumik tunngavissaqarsimanngitsoq.

Kommunip uannut allakkamini 18. juni 2020-meersuni Naammagittaalliuuteqartarfiup aalajangiinerani 17. december 2019-imeersumi immikkoortoq innersuussutigalugu Naammagittaalliuuteqartarfiup aalajangiinera A-p inuuniarnermut ikiorsiissutisiaasa 1. januar 2015-imit sunniuteqalersumik ikililernissaannut kommunimik pisussaaffiliisuunerarlugu oqarnera isumaqatiginngilara.

Isumaqarpunga A-p inuuniarnermut ikiorsiissutisiaanik 1. januar 2015-imit sunniuteqartumik ikililerinissamik kommunip taamaaliornissaminut inatsisikut tunngavissaqarani aalajangiisimanagera isorisarialerujussusoq.

Suliaq A-mut tunngasoq kommunip suliami oqaatigisakka isiginiarlugit suliareqqissagaa inassutigaa.

Kommuni qinnuigaara oqaaseqaatiga inassutigalu kommunip qanoq iliuuseqarnissaanut pissutissaqalersitsinersut uannut ilisimatitsisutigeqqullugu.

Oqaaseqaat manna oqaaseqaammi pineqartut kikkuussusii ilisarnarunnaarsillugit nittartakkanni tamanut saqqummiunneqarumaarpoq 2020-milu ukiumoortumik nalunaarutinni eqqaaneqarumaarluni.

SULIAP INGERLASIMANERA

Kommuneqarfik Sermersuup (matuma kingornatigut kommunimik taaneqartartussap) allagai kommunip suliamik malitseqartitsivigineqarneranik imaqartut kiisalu kommunip aalajangiinerata nutaap 22. januar 2020-meersup assilineranik ilaqartut 7. maj 2020-mi tiguakka.

Aalajangiinnermit ilaatigut makku erserput:

“Uunga tungasoq: Pisortat ikiorsiissutaannik aningaasat amerlassusilerneqarnerisa januaarip aallaqqaataani 2015-imiit allanngortinneqarneri

Isumaginninnermi Naammagittaalliuteqartarfiup decembarip 17-ianni 2019 aalajangerpaa, illit pisortanit ikiorsiissutivit annertussusilerneqarnerannik 2015-imi januaarip aallartismalerneraniit kommunip aalajangiinera atorunnaarsillugu. Isumaginninnermi Naammagittaalliuteqartarfiup suliaq nutaamik suliareqqitassanngorlugu utertinnikuuaa, taamaalilluni illit ikiorserneqarnissannut pisinnaatitaa-nersutit pillugu kommunimut nalilersoqqitassanngortinneqarluni, taamaassappallu aningaasartaritinneqartussat qassiussanersut uppernarsaqquneqarlutik.

Aalajangiineq:

Ullut 14-ikkaartumik inuuniarnermut ikiorsiissutit ilinnut nammineq inigisalimmut kisimiittumut januaarip aallaqqaataani 2015-imiit 775 kr.-nut aalajangersarneqarput.

Pissutsit piviusut aalajangiinnermut tungavileeqataasut:

Januaarip aallaqqaataata 2015-ip tungaanut ullunut 14-inut inuuniarnermut ikiorsiissutit illit kisimiittut nammineq ineqartutut pisartakkatit 1014 kr.-nik amerlassuseqarput. Kommunalbestyrelsip novembarip 25-anni 2014-imi, 2015-imut missingersuutit akuersissutiginerinut atatillugu aalajangerpaa, inuuniarnermi ikiorsiissutit pillugit tamanut kiffartuussinerup qaffasissusia ilitsersuutaasumik aningaasartaritinneqartunut appartinneqassasoq. Imaappoq, januaarip aallaqqaataani 2015-imiit inuuniarnermut ikiorsiissutit ullut 14-ikkaarlugit tunniunneqartut kisimiittumut nammineq inigisalimmut 775 kr.-nik aningaasartaqalersinneqarput. Ikilisaanermut tungavissaqartumik pingaarnertut toqqammavigineqarpoq, inuussutissanut ikiorsiissutaasartut Nunatsinni kommunit sinnerinut sanil-

liullugit Sermersuumi ilitsersuutaasumik qaffasissuseq tamanut atuutsinneqartoq qaffasinnerummat.

Inatsisitigut tunngavissat:

Inuuniarnermut ikiorsiissutinik pisartagaqassanersutit pillugu aalajangernermut tunngaviuvoq illit suliffissaaleqisutut nalunaarsorneqarsimagavit, aammalu pisortanit ikiorsiissutit pillugit Inatsisartut peqqussutaanni nr. 15-imi, 20. novembari 2006-imeersumi § 8, imm1, nr 1 tunngavigalugu aalajangiinerulluni:

§ 7. Kommunalbestyrelse tassangaannartumik pisariaqavissumik pissaaleqilernermi pisortanit ikiorsiissuteqarsinnaavoq qinnuteqartoq

- 1) inooqatigiinnermi pisimasumik, soorlu nappaammik, erninermik, suliffissarunnermik inooqatigiikkunnaarnermilluunniit nalaataqarsimappat, aamma*
- 2) imminut ilaqtaminillu pilersuineranut akiligassanullu aalajangersimasunut pisariaqartitaminik pissarsisinnaangippat.*

§ 8. Kommunalbestyrelsi pilersuineranut akiligassanullu aalajangersimasunut kiisalu ataasiartumik aningaasartuutitut pisortanit ikiorsiissuteqarsinnaavoq, qinnuteqartup § 7-imi piumasaqaatit naammassisimappagit kiisalu

- 1) suliffissaqanngikkuni suliffissaminillu naammaginartumik neqeroorfigineqarsimannngikkuni pimoorullugulu suliasarsioruunngikkuni*
- 2) sungiussiniarnermigut ajornartorsiornini, peqqinnginnini assigisaallu pissutigalugit sulisinnaangitsutut nalilerneqaruni imaluunniit*
- 3) napparsimaguni imaluunniit erninermut atatillugu sulinngiffeqaruni taamalu sulisinnaanani.*

Imm. 2. Naalackersuisut pilersuineranut akiligassanullu aalajangersimasunut kiisalu ataasiaannartumik aningaasartuutissanut pisortanit ikiorsiissutisisinnaarnermut piumasaqaatit pillugit maleruagassanik aalajangersaasinnaapput, tassunga ilanngullugu sulilernissamut piareersimanissamut piumasaqaatinik qaqugukkullu qinnuteqartoq sulisinnaangitsutut nalilerneqartassanersoq.

Inuuniarnermut ikiorsiissutinut aningaasartaritinneqartut pisortanit ikiorsiissutit pillugit Inatsisartut peqqussutaanni nr. 15-imi, 20. novembari 2006-imeersumi § 13, imm. 1-4 tunngavigalugit amerlassusilerneqarput:

§ 13. Pilersuineranut akiligassanullu aalajangersimasunut pisortanit ikiorsiissutisiat annertussusaat missiliuussinikkut aalajangerneqartarpoq qinnuteqartup

maannamut inuuniarnikkut atugarisimasai, pilersuisutut pisussaaffii, katissimallugu aapparisaq, nalunaarsorneqarsimasumik aapparisaq imaluunniit naligisatut inooqatigisap isertitai, akiligassat aalajangersimasut najukkamilu pissutsit tunngavigalugit.

Imm. 2. Taamaallaat pisartagaqartumut taassumalu ilaqutaasa pisariaqavissutigut pilersornissaannut ikiorsiissutinik tunniussisoqarsinnaavoq aammalu ineqarnermut akiliummut, atuinermut aningaasartuutitut aningaasartuutinullu aalajangersimasunut allanut matussutissanik naleqquttunik.

Imm. 3. Aningaasartuutiviusut tunngavigalugit kiisalu najugaqatigiissinnaanermi iluaqutissat aallaavigalugit aningaasat aalajangersarneqassapput. Pilersuinermut aningaasartuutinullu aalajangersimasunut pisortanit ikiorsiissutit annerpaamik SIK-p Naalakkersuisullu akornanni isumaqatigiissutit naapertorlugit ilinniarsimannigsumut aningaasarsiaritit ikinnerpaaffiisa 65%-erisinnaavaat, taamaattorli imm. 4 takuuk.

Imm. 4. Pisuni immikkut ittuni SIK-p Naalakkersuisullu isumaqatigiissutaat naapertorlugu suliamik ilinniagaqarsimannigsumut aningaasarsiaasa minnerpaat 65%-iat sinnerlugu ikiorsiissutinik tunniussisoqarsinnaavoq, tamanna pisariaqavissappat qinnuteqartup ilaqutaasalu pilersorneqarnissaannut akiligassanullu aalajangersimasunut, naleqquttumillu ineqarniarnermikkut atugaqaannarnissaannut.

Inuuniarnermut ikiorsiissutisiavit amerlassusissaat pillugu aalajangerneq aamma pisortanit ikiorsiissutit tunniunneqartarnerat, iliuusissatut pilersaarutit, sulisinnaassuseq il.il. pillugit Namminersornerullutik Oqartussat nalunaarutaanni nr. 4-mi, 15. marts 2007-imeersumi § 14 aamma § 15, imm. 3 naapertorlugit aalajangersarneqarput:

§ 14. Inuuniarnermut ikiorsiissutit kommunalbestyrelsimit qinnuteqaateqartup pisartagaqartuusullu pilersuisuunermikkut pisussaaffii aalajangersimasumik missiliuussiffigalugit aalajangerneqartassapput aamma inooqateqamikkut imaluunniit najugaqateqarnikkut pitsaaqutit aallaavigalugit.

Imm. 2 Aammattaaq inuuniarnermut ikiorsiissutit aalajangersameqartassapput sumiiffinni nunamilu sumiinnermi pissutsit aallaavigalugit, taamaalilluni akit killiffiat, tapertaqarsinnaanikkut periarfissat assingusullu naliliinermut ilanngunneqassallutik.

§ 15. Kommunalbestyrelsi ikiorsiissummik annertussusiliinermini aningaasartuutit annertussusaannut uppernarsaatinik piumasagaateqassaaq, taamaattoq takuuk imm 3.

Imm. 2 Aningaasartuutit annertussusiinut uppernarsaatit akiligassat allagartarisinnaavaat, kontomit anillatitat, PBS atorlugu akilersuutit assigisaalluunniit.

Imm. 3 Inuuniarnermut ikiorsiissutit uppernarsartariaqassanngillat, kommunalbestyrelsimiilli, pisartagaqartuusup inuuniarneranut suut naammaginartutut isigineqarsinnaanersut toqqammavigisaanik qularnaarinniisunik aalajangersimasumik missiliuussineq naapertorlugu aalajangersarneqartassallutik.

Missiliuusionerani tunngavilersuutaasoq/pingaarnertut eqqarsaatigineqartoq tassaavoq:

Suliami ilinnut tunngasumi, inuuniarnermi illit immikkut ittumik pisariaqartitsinerit paasissutissiissutigineqanngimmat, assersuutigalugu sapigaqarneq pissutigalugu nakorsamit uppernarsaatitaqartumik inuussutissanik immikkut ittunik pisariaqartitsinersutit, imaluunniit pitsorlutsissimaguit atuinermik annertusititsisumik, taava kisimiittumut nammineq ineqartumut inuussutissanut ikiorsiissutit ilinnut tunngasut januaarip aallaqqaataani 2015-imiit ullut 14-ikkaarlugit tunniunneqartartut 775 kr.nut amerlassusilerneqarput. Inuussutissanut aningaasartaliunneqartut taakkua erseqqissumik missiliuusioneqartut illit inuuninni naammattumik toqqammavissaqarnerat pingaartinneqarpoq. Ikiorsiissutinik pisartagaqarnissannut pisinnaatitaavutit piffissami pineqartumi suliffissaaleqisutut nalunaarsortissimamerit pissutigalugu. Taamaalillutit ulloq 06. januaari 2015 suliffissaaleqisutut nalunaarsortissimavutit, taamalu aamma 20. januaari 2015.”

Kommunimut 2. juni 2020-mi ilaatigut imatut allappunga:

“Kommuneqarfik Sermersuup pisortanit ikiorsiissutisiaat ikililerneqarnissaannik aalajangiinera 22. januar 2020-meersoq

A-p pisortanit ikiorsiissutisiaasa ikililerneqarnissaannik Kommuneqarfik Sermersuup (matuma kingornatigut kommunimik taaneqartartussap) aalajangiinera 22. januar 2020-meersoq kiisalu kommunip suliamut malitseqartitsiviginninnera pillugu allakkat 7. maj 2020-mi tiguakka.

Nammineerluni misissuiffiginninnermik aallartitsinissara aalajangiineq 22. januar 2020-meersoq tunngavigalugu isumaliutersuutigaara, tak. Inatsisartut Ombuds-

mandiat pillugu Inatsisartut inatsisaanni nr. 7-imi, 1. juni 2017-imeersumi § 15, imm. 1.

Taamaattumik suliap ingerlasimanera tulliuuttuni allaaseraara. Tassunga tulliuupput suliaq pillugu apeqqutikka kiisalu kommunip allagai 7. maj 2020-meersut pillugit oqaaseqaatikka.

1. Suliap ingerlasimanera

[...]

2. Uanga Kommuneqarfik Sermersuup aalajangiineranik 22. januar 2020-meersumi paasinninera

Kommuneqarfik Sermersuup aalajangiineranit 22. januar 2020-meersumit erserpoq A-p inuuniarnermut ikiorsiissutisiai kommunip 1. januar 2015 aallarnerfigalugu ullut 14-ikkaarlugit 775 kr.-nut aalajangersarsimagai.

Aalajangiinermi aammattaaq erserpoq A-p inuuniarnermut ikiorsiissutit 1.014 kr.-t ullut 14-ikkaarlugit Kommuneqarfik Sermersuup 2015 sioqqullugu tigusarsimagai.

Kommuneqarfik Sermersuup aalajangiinera imatut paasivara kommuni isumaqartoq A-p inuuniarnermut ikiorsiissutisiaanik ikililerineq 1. januar 2015-imit inatsiseqartitsinikkut sunniuteqalissasoq kommuni 22. januar 2020-mi aalajangiisimasoq.

Kommunip kingumoortumik atuutilersumik aalajangiinissaminut sumik inatsisikut tunngaveqarsimanera kommunip aalajangiinerani 22. januar 2020-meersumi takuneqarsinnaangilaq. Tamatuma kommuni ilumut taamaaliorinnaaneranik apeqqut saqqummersippaa.

3. Suliaq pillugu apeqqutikka

Kommuneqarfik Sermersooq qinnuigaara A-p inuuniarnermut ikiorsiissutisiaasa kingumoortumik atuutilersumik ikililerneqarnissaannik aalajangiinerminut inatsisikut tunngavigisani pillugu nassuiaateqaqqullugu.

Kommuni inatsisikkut tunngavissaqarani isumaqarpat qinnuigaara kommunip aalajangiinera 22. januar 2020-meersoq sutigit inatsimmik unioqqutitsisuunnginnersoq nassuiaqqullugu.

Ingerlatsiviup aalajangiineq kingumoortumik sunniuteqartinniarpagu tamatuma inatsisikkut erseqqissumik tunngavissaqarnissaa piumasaqaataasoq Danmarkimi inatsiseqartitsinermik periaatsimi aalajangersimasumik ilimagineqarpoq.

Tamanna ilaatigut Højesteretsip eqqartuussutaani aalajangersarneqarpoq, taannalu "Ugeskrift for Retsvæsen 2016"-imi quppernermi 140-mi issuarneqarpoq. Suliami pineqartoq tassaavoq kommuni, pisoq taannaasoq pillugu aalajangiineq atuussinnaassuseqanngitsutut oqaatigineqareersoq napparsimanermi ullormusiat atorunnaarsinneqarnissaannik kingumoortumik atuutilersumik aalajangiisimasoq. Højesteretsi isumaqarpoq aalajangiinerup nutaap taassuma kingumoortumik sunniuteqartinneqarnissaanut napparsimanermi ullormusiat pillugit inatsimmi imaluunniit ingerlatsineq pillugu inatsiseqartitsinermi tunngaviit nalinginnaasut malilugit tunngavissaqanngitsoq.

Assersuutip taassuma assingi Østre Landsretsimi eqqartuussutiniittut "Ugeskrift for Retsvæsen 1996"-imi quppernermi 724-imi aamma "Ugeskrift for Retsvæsen 2018"-imi quppernermi 2849-mi issuarneqartut takukkit.

./. Eqqartuussutit taaneqartut pingasut taakkua assilineri ilanngullugit nassiuppakka.

Isiginninnerup qulaani ersertup Danmarkimi inatsisilerineq pillugu atuakkiani ataatsimut ilimagineqarnera aammattaaq innersuussutigaa. Tamatumunnga atattillugu Sten Bønsingip atuakkiaani "Almindelig Forvaltningsret, Almindelig Emner"-mi sisamasaanik naqitertinneqartumi (2018-imeersumi) qupperneq 236, Karsten Revsbechip aamma Søren H. Mørupip allallu atuakkiaanni "Forvaltningsret"-imi arfinilissaanik naqitertinneqartumi (2016-imeersumi) qupperneq 551, Søren H. Mørupip atuakkiaani "Berettigede forventninger i forvaltningsretten"-mi (2005-imeersumi) qupperneq 327 aamma Jon Andersenip allallu atuakkiaanni "Forvaltnings-ret"-imi aappasaanik naqitertinneqartumi (2002-meersumi) quppernerit 303 tullialu innersuussutigaa.

Taakkua saniatigut Folketingip Ombudsmandiata 2016-imi ukiumoortumik nalunaarutaani qupperneq 33 aamma innersuussutigaaara, tassanilu Ombudsmandip kommunimi nutaamik kingumoortumik sunniuteqartumik aalajangiinissamut periarfissaq pillugu ilaatigut makku oqaatigai:

“3.3.4. Taamaalilluni aalajangiinermik nalunaarutiginnikkut kukkunerup suliame illua’tungiusup aalajangiinermik kingusinnerusukkut nalunaarfigineqarneratigut (-rinnaatigut) (imaluunniit piffissami taannaasumi, tassalu kingumoortumik, atuutilersumik nutaamik aalajangiinikkut) “aaqqinnissaanut” periarfissaqanngilaq.

[...]

Uanga paasinninnera unaavoq piffissami tunngaviusumik aalajangiinerup 37-15-ip tamanut saqqummiunneqarfiata nalaani, imaluunniit piffissamit kommunip Ankestyrelsip aalajangiineranik siullermik kommunip aalajangiinerata atuussinnaassuseqannginneranik oqaatiginnittumik tigusaqarfianit (uanga paaseqqaakkattut 29. juli 2015-imit) kommunimut erseqqissimassagaluartoq nalunaaruteqarnermi kukkuneq suliame illua’tungiusut marluutillugit/inooqataasup pisartagaqartumut nalunaarutaaqqaartumik paasitinneqarnerinnaasigut imaluunniit kingumoortumik atuutilersumik nutaamik aalajangiinikkuinnaq “aaqqissinnaanagu.”

Tamanna tunngavigalugu aamma kommunimut piffissamit tassannga kommunimut erseqqissimasariaqaraluarpoq kommuni pisussaaffeqartoq aalajangiinerit allat nalunaarutigineqarneri taamatut kukkussuteqarfiusut allanngortinnissaanut, tunniuttakkallu suliame illua’tungiusunut tamanut nutaamik aalajangiisoqarnissaata tungaanut tunniuttarnissaannut. Tamatumani manna pingaartillugu isiginiarpara, tassalu suliat suussusii paasineqarsimasut suliallu ima amerlatiginatik sularineqarnerat kommunimut aqutsinermi allaffissornikkut anner-tuumik nanertuutaanaviarani.” (Ombudsmandeqarfimmi nutsigaavoq)

Folketingip Ombudsmandiata oqaaseqaataa qulaani issuarneqartoq (FOB 2016-33) Folketingip Ombudsmandiata nittartagaani (www.ombudsmanden.dk-mi) atuarneqarsinnaavoq.

Isumaqarpunga ingerlatsinermi inatsiseqartitsineq pillugu atuakkiani allaaserineqartut aamma Folketingip Ombudsmandiata periaasia Kalaallit Nunaanni tamatuma pissuseqataanik atorneqassasut, tassami Kalaallit Nunaanni inatsiseqartitsinikut tunngaviup Danmarkimi inatsiseqartitsinikkut tunngavik innersuussutigineqartunit ersertutut pingaarnertigut assigimmagu.”

Suliaq pillugu oqaaseqaat kommunip allakkatigut 18. juni 2020-meersutigut nassiuppa. Kommunip tamatumunnga atatillugu ilaatigut makku oqaatigai:

“Kommunip akissutaa:

Isumaginninnermi Naammagittaalliuuteqartarfiup suliareqqitassanngortitsilluni aalajangiinerani 17. december 2019-imeersumi tunngaviit kommunip malippai, tassanilu Naammagittaalliuuteqartarfik imatut allappoq:

Suliaq Isumaginninnermi Naammagittaalliuuteqartarfiup suliareqqitassanngortillugu utertippaa. Tassa imaappoq suliaq kommunip suliareqqissagaa. Taamaattumik inissinneqassaatit soorlusooq kommuni 2015-imi januarip aallartin-nerani ilinnut aalajangiisimanngitsoq.

Taamaattumik pisortanit ikiorsiissutinik taamani pisinnaatitaasimanersutit ikiorsiissutisisinnaatitaaguillu qanoq amerlatigisumik ikiorsiissutisisinnaatitaasimanersutit kommunip massakut nalilersussavaa. Aalajangiineq kommunip tamatum kingornatigut ilinnut eqqortumik nalunaarutigissavaa.

Isumaginninnermi Naammagittaalliuuteqartarfik “taamani”-mik allammat kommunip tamanna 2015-imi januarit paasivaa, taamaalilluni aalajangiineq 2020-mi aalajangiinerup nalaaniit siumuinnaq atuunnani kingumoortumik 2015-imi januarimit atuutissalluni.”

Isumaginninnermi Naammagittaalliuuteqartarfik (matuma kingornatigut Naammagittaalliuuteqartarfimmik taaneqartartussaq) 25. juni 2020-mi qinnuigaara Naammagittaalliuuteqartarfiup aalajangiineranik 17. december 2020-meersumik kommunip paasinninnera kommunip uannut allakkamigut 18. juni 2020-meersutigut saqqummiussaa isumaqatiginerini paasissutissiis-sutigeqqullugu.

Naammagittaalliuuteqartarfiup akissutaa 17. august 2020-mi tiguara. Naammagittaalliuuteqartarfiup tamatumunnga atatillugu ilaatigut makku oqaatigai:

"Isumaginninnermi Naammagittaalliuuteqartarfiup allattoqarfia Inatsisartut Ombudsmandiata Isumaginninnermi Naammagittaalliuuteqartarfimmut allagai 25. juni 2020-meersut innersuussutigalugit matumuuna akissuteqarpoq.

Inatsisartut Ombudsmandiata saaffiginnissutaa Isumaginninnermi Naammagittaalliuuteqartarfiup allattoqarfiata apeqquditut pingasutut paasivaa:

1. "Isumaginninnermi Naammagittaalliuuteqartarfik tamanna tunngavigalugu qinnuigaara Isumaginninnermi Naammagittaalliuuteqartarfiup aalajangiinera 17. december 2019-imeersoq kommunip eqqortumik paasisimaneraa uannut paasissutissiissutigeqqullugu."

2. "Isumaginninnermi Naammagittaalliuuteqartarfik isumaqarpat Isumaginninnermi Naammagittaalliuuteqartarfiup aalajangiinera 17. december 2020-meersoq kommunip eqqortumik paasisimagaa, taava Isumaginninnermi Naammagittaalliuuteqartarfik qinnuigaara [innuttaasup aqqa] inuuniarnermut ikiorsiisutisiaasa kingumut atuutilersumik ikililernerqarnissaannik aalajangiinermut inatsisikkut tunngavigisaq pillugu nassuiaateqqaqullugu."

3. "Isumaginninnermi Naammagittaalliuuteqartarfik isumaqarpat Isumaginninnermi Naammagittaalliuuteqartarfiup aalajangiinera 17. december 2020-meersoq kommunip eqqunngitsumik paasisimagaa, taava Isumaginninnermi Naammagittaalliuuteqartarfik qinnuigaara aalajangiinerup 17. december 2019-imeersup qanoq eqqortumik paasineqarnissaa pillugu nassuiaateqqaqullugu."

Apeqqummut 1-imut akissut

Isumaginninnermi Naammagittaalliuuteqartarfiup allattoqarfiata tunngaviutippaa Inatsisartut Ombudsmandiata allakkamini 25. juni 2020-meersuni immikkoortoq una innersuussutigigaa:

"Isumaginninnermi Naammagittaalliuuteqartarfik "taamani"-mik allammat kommunip tamanna 2015-imi januaritut paasivaa, taamaalilluni aalajangiineq

2020-mi aalajangiinerup nalaaniit siumuinnaq atuunnani kingumoortumik 2015-imi januarimit atuutissalluni.”

Kommunip aalajangiinera 2015-imi januarimeersoq Isumaginninnermi Naammagittaalliuuteqartarfiup aalajangiinermini 17. december 2019-imeersumi suliareqqitassanngorlugu utertippaa. Taamatutaaq, aalajangersimasumik periaaseq malillugu, kommunip nutaamik aalajangiinissaanut ataatsimut tunaartarisassat Isumaginninnermi Naammagittaalliuuteqartarfiup innersuussutigai, matumani aalajangiinerup nutaap aningaasat qassiussusiannik imaqartussaanera kiisalu innuttaasumut eqqortumik nalunaarutigineqartussaanera ilanngullugit eqqarsaatigalugit.

Kommunip aalajangiinermini nutaami suna angusariaqarneraa aalajangiinermini 17. december 2019-imeersumi erseqqissumik isummerfigineqanngilaq. Tamannami isummerfigineqarsimagaluarpat Isumaginninnermi Naammagittaalliuuteqartarfiup oqartussaasutut siullertut aalajangiinera pineqassagaluarpat.

Piffissaq kommunip aalajangiinerata nutaap sunniuteqalerfia aalajangiinermini 17. december 2019-imeersumi erseqqissummik aamma isummerfigineqanngilaq. Kommunip aalajangiinerata siulliup sunniutaa kisimi suliareqqitassanngortitsinikut erseqqissumik isummerfigineqarpoq: Tassalu innuttaasoq soorlusooq aalajangiisoqarsimannngitsutut inissinneqassasoq.

Apeqqummut 2-mut akissut

Apeqqummut 1-imut akissummi qulaani oqaatigineqartutut piffissaq kommunip aalajangiinerata nutaap sunniuteqalerfia Isumaginninnermi Naammagittaalliuuteqartarfiup aalajangiinerani 17. december 2019-imeersumi erseqqissumik isummerfigineqanngilaq.

Kommunip aalajangiineranut nutaamut inatsisikkut tunngavigisamik itisiliineq eqqarsaatigalugu kommuni oqartussaasutut eqqortutut innersuussutigineqarpoq.

Apeqqut 3

Apeqqummut 1-imut akissut innersuussutigineqarpoq.” (Ombudsmandeqarfimmi nutsigaavoq)”